





C 205
i
L














L'ORACLE
DELPHIQUE.

OU,

Le courageux Soldat François.

Case

F

39

.326

1615 or

NEWBERRY
LIBRARY



L' O R A C L E

DELPHIQUE.

Ou le courageux Soldat François.

HE' quoy miserables François, ferons nous tousiours si peu d'estat de nos Roys? enuierons-nous tousiours leurs Couronnes? & voudrons nous les deposseder tousiours de leurs Sceptres? Dieu, qui les a establis pour nous gouverner sous l'equité de leurs Loix, n'a-il pas sujet des'offenser de vous voir si peu respecter & honorer ces viues images de son cœur, auxquelles il a dōné puissance de cōmander absolūmēt sur ses creatures, c'est accuser le Ciel que de trouuer à redire à leurs actions, qui n'ont de mouuement que par ceux qu'une seureté & diuine intelligence leur donne, & luy vouloir faire la guerre, que de semer la discorde parmy leurs peuples. Les cœurs des Roys sont en la main de l'Eternel, qui ne peuuent rien produire que de bon, agissant par de si bonnes influences: Quel sujet donc, vouloir reformer ce qui est parfait, blasmer ce qui ne peut faillir, & troubler ce qui nous met en repos. Ingrats à nostre Roy & perfides à nostre patrie, hayrons-nous l'un sans mespriser l'autre, souhaitterons-nous du mal

A ij

à celuy-cy, sans rechercher la perte de celuy là. Non non, nul pretexte que ce soit n'est vallable au sujet; pour se dispenser du serment de fidelité iuré à son Prince, il n'y a rien pour l'exempter de l'hommage qu'on luy doit. C'est vn Soleil dont tous les autres Astres empruntent la clarté, & sa lumiere se prodiguent esgalement sur tous ses peuples, leur doit si bien enflammer l'ame de ses raiz qu'ils ne doiuent recevoir d'autre iour à leur veüe que le sien. Si au temps où nous sommes la fortune faisoit les Roys de France à sa poste, comme elle en a autresfois fait, Agatocle fils d'vn Potier, Roy de Sycile, Darius Courtier ou Messager ordinaire Roy de Perse, Telephanes vn simple chartier, Roy de Lydie, le grãd Tamburlã vn porcher, Ptolomee vn bouuier, Roy d'Ægypte, & l'Empereur Iustin tout de mesme. Il y auroit plus de droit à discourir, mais ce n'est pas de mesme, car ce n'est point en France que la fortune donne l'Empire; C'est le Ciel, la naissance, & le merite; Nostre grand Roy Louys le plus vaillant & le plus clement de tous, n'est il pas legitime successeur d'Henry le Grand, la merueille de tous autres Roys, n'est-il pas paruenü à la Couronne par le droit & la Iustice, on peut donc par luy disputer vn tiltre que le Ciel luy a donné en vne Couronne qui luy est son propre heritage, ô Dieu, que les siecles passez different bien du temps present. Les petits autresfois paruenoient à la gloire par bon vent, & s'y maintenoient sans enuie, & maintenant les maisons les plus illustres ont assez à faire de maintenir leur Couronne, & conseruer leur

5

grandeur. Quels assauts n'a point receu nostre Roy le Iuste au commencement de son regne; il ny entra que par les armes, & à peine fut-il en la place de son pere, qu'il fallut qu'il s'assurast parmy des troubles & des reuoltes, les Princes mescontens, quiterent la Cour, prirent les armes contre sa volonté, & demanderent à reformer l'Estat: mais ce ieune Alcide les remettât tous au chemin de leur obeyssance, les attira encore vn coup sous son aisse, pour fondre leurs glaçons au feu de son amour. De là il s'est ensuiuy mille autres desordres, & quelque paix que l'on aye depuis faite, n'a esté qu'un renouvellement de guerre, les sujets se sont bandez contre leur Souuerain, & le Souuerain les a remis en sa grace: Il m'est aduis que quelqu'un s'estonnant de me voir parler si hardiment demandera qui ie suis, & quel interest i'ay aux affaires d'Estat, voicy mes raisons, c'est que ie suis bon François & courageux Soldat, qui ay tousiours porté les armes pendant la paix & la guerre, inferez maintenant: puis que ie suis Soldat, puis que ie suis noble, & qu'il appartient au Soldat de parler franchement, n'ay-je pas occasion de me remuer quand l'occasion s'en presente, & parler des Princes qui sont les images de Dieu? S'il est licite à vn Soldat de parler de la foy de Dieu, ne me sera-il pas licite de parler de la foy & de l'obeyssance que l'on doit au Prince? Certes ie meritois d'estre dégradé du tiltre de ma noblesse, si i'estois muet. Le Gentil hōme qui conniue quand il void qu'on querelle son Roy, est traistre à la Couronne. Ne dire mot, ne bouger de place

quand on void que quelqu'un veut troubler l'E-
 stat, c'est estre lasche, perfide, & degenerer de la
 vraye noblesse, c'est tout autant comme se jeter
 au party contraire, & se rendre par ce moyen cri-
 minel de leze Majesté. Aux derniers troubles que
 l'ennemy entra par trahison à certaine ville où j'ay
 mon patrimoine à cause que ie tenois le party du
 Roy, vn meschant borgne Soldat enleua toute ma
 fortune. J'auois recueilly cette annee à toutes
 mains en mes terres, quatre boisseaux & demy de
 bled, manque vne poignée, deux escuelles de che-
 neuis, autant de millet, vne once de saffran, la qua-
 triésme partie d'un baricot de vin. Le meilleur de
 mon bien consistoit en gazailles. J'y auois vne
 truie qui me faisoit neuf cochons chaque ventree,
 vne fois elle en fit vnze, parce qu'il me facha de
 payer la dixme au Curé, les deux moururent, en
 restèrent neuf comme de coustume. J'y auois vne
 chevre, trois moutons, vn bœuf & vn asne que ie
 tenois exprés pour labourer. Je sçay bien que cela
 est deffendu par les saintes loix. Mais la necessité
 n'a point de loy. Tant y a, que tout cela s'en alla.
 Mengeoc & Tymar furent cause de ma perte, par-
 ce qu'il mirent l'ennemy dedans. Encore celuy
 qui participa au butin estoit cousin second de ma
 mere. Regardez quelle foy il faut adiouster aux
 gens d'armes. Certes ie croy qu'ils ne vont à la
 guerre que pour piller, & croy fermement que le
 fils qui veut faire ce mestier comence par son pere,
 & qu'il luy met tout à sac auparauant qu'il s'aille
 enroller sous la charge d'aucun Capitaine. On
 pourroit acheuer de me ruiner, ie suis resolu de vi-

ure & mourir au seruice du Roy. Vn office de Sergent des Capitouls payera tout cela, si vne fois la Majesté a la cognoissance de mon merite. L'Office de Sergent Major n'est point asseuré, parce que la guerre n'est point asseuree. Et puis pour vous dire vray, i'aymerois mieux faire vn petit exploit de pratique, & mettre la main au collet de quelque malfacteur, que trancher du gros, monter à cheual sur vne houlle, commander à ceux qui ont autorité, ce seroit faire des ennemis, à quoy mon naturel ne me porte, que ie n'y sois forcé par la necessité. Donques pour reuenir au point, ce peu de cognoissance que Dieu m'a donné en mon art, ie le veux employer pour le seruice du Roy, & suis d'auis qu'on bannisse de tous les quatre coins de la France cette hereſie de guerre, quel pretexte que l'on puisse auoir. Nous n'auons point affaire de ces cheuaux Troyens, qui sous ombre de pieté de vouloir consacrer à Minerue, reformer l'Estat, veulent abbatre nos murailles, saccager nos maisons, & mettre tout en cendres. La guerre est vn tizon d'enfer, qui ard perpetuellemēt dans le cœur de ceux qui ne peuuent estre pacifiques. Vn Magicien se vante de faire gresser en quelque lieu pour se venger de ses ennemis : il ne le peut faire qu'il n'incommode ses amis, & que la gresse qu'il proiette de faire tomber aux champs d'autrui, ne gaste pareillemēt les fruiets qui sont en la terre, De mesme, celuy qui pour la particuliere malice de quelqu'un fait gresser les canōs, excite les foudres de la terre, il ne peut tellemēt offenser son ennemy, qu'il n'offense soy & son amy propre. La hayne, la ran-

cune sont sans yeux aussi bien comme l'amour. Quand la passion aveugle, on ne regarde point ce que l'on fait : On combat en Andabate, on frappe si bien sur la teste, comme aux talons. L'experience des choses passees deuroit arrester ceux qui courēt sans bride à tels appetits, & ceux qui ne le sçauent s'en deuroiēt informer avec les vieux, jeter la veuë sur les histoires, & considerer quels mal-heurs les discordes ciuiles ont apportez à la France. On ne peut point esperer de gagner plus que d'autres qui ont esté accompagnés de pareils pretextes, la playe des guerres dernieres n'est pas encore biē consolidée, elle seigne encore en plusieurs endroiçts du Royaume, & toutesfois on veut faire encore de nouveaux efforts à l'Estat : mettre playe sur playe, coup sur coup, n'est-ce pas en effect procurer la ruine, & tascher totalement de l'exterminer ? les diuisions dernieres en ont sappé les fondemens, l'arbre a esté esbranlé, on le veut accabler & renuerfer par terre. Quelle assurance sçaura-on trouuer parmy les estrangers, puis que nos domestiques nous guerroyēt ? Le mal est incurable qui vient par le dedans, & ne peut guerir que par vne faueur speciale de Dieu, ou par l'obseruation la plus exacte de la Medecine. Que deuendra la santé du corps, mais quels trances souffrira le pauvre malade, si le venin de la discorde infecte les parties Nobles, & serpente iusques au cœur ? Les Nobles & ceux qui le sont principalement à cause de leur sang, sont les esprits vitaux qui fōt viure & respirer ce corps Monarchique : s'ils s'esloignent & separent du cœur, par quel moyen pourra-il viure ? l'ay enuie
de

de desgoiser, permettez-le moy ie vous prie, ie vous diray chose qui par aduenture estonnera les Grands & animera les petits. La discorde & diuision entre Princes, feust cause que la ville de Rome tomba entre les mains des Visigots, qui rauerent longuement l'Italie & vne bonne partie de Gascogne, iusques aux montagnes Pirenees, voire le saint siege en feust tellement blessé, qu'il feust besoin que nos Roys de France (vrais Podalyres de Dieu) y missent la main, en telle sorte que Charles le Grand, ayant chassé Luitprand, vaincu Didier Roy de Lombardie, remist le Pape Adrian troisieme en sa chaire Apostolique, en recompense dequoy il fust créé Empereur de l'Occident en plain Concile, & feust lors l'Empire affecté & vny à la Couronne de France, lequel on en a laissé separer par la mauuaise mesnagerie, de laquelle on a vze en cest Estat, les Princes du sang ne faisant autre mestier que ce harceler. Quand la fortune rift en vne maison, il semble que les larmes n'y doiuent iamais distiller, l'Empire d'Orient comment est-il tombé entre les mains des Turcs? La discorde qui feust entre les freres de Constantin huietieme en est la cause, & pour passer plus auant, le schisme & la diuision de l'Eglise Grecque avec la Latine. L'exemple de Scylurus est veritable, tandis que les parens se tiennent liez d'une ferme amitié, les vns, les autres, il est impossible de les rompre & separer; Mais s'ils se deslient & separent eux-mesmes, le moindre incontinent les accable & les brise. Alexandre le Grand en peu de temps conquist le Monde, mais tout incontinent apres sa mort, par

la mauuaise intelligēce des siens le fruit de sa conqueste s'esuanouïst, les Diademēs furent dispersez, & tous ses Sceptes tomberent entre les mains des estrangers. Ptolomee print l'Egypte, Laomedon la Syrie, Python la Medie, Eumenes la Paphlogonie & la Capadoce, Antigonus la Pamphilie la Lycie, & la grande Phrygie, Cassander se saisist du Royaume de Carie, Meleager de la Lydie, Lyfimachus eust la Thrace, Antipater la Macedoine, & d'autres enuahirent d'autres Royaumes & Provinces, iusques au nombre de 22. Les Royaumes, terres & Duchez, qui ont appartenu à la France où sont ils? on sçait bien par quelle voye ils en ont esté allienez. La dissension des Princes, leur mauuaise intelligence en est la cause. Il ne faut point qu'on en donne le tort à la violence des armes, à la vicissitude du temps, ny au changement de fortune, car on sçait bien que les François sont si guerriers, tandis qu'ils se tiennent en amatié, qu'ils ne succombent iamais à l'effort de leurs ennemis; & puis dès que la fortune s'est establie en vn lieu, il est mal-aisé de l'en arracher si on la sçait caresser & entretenir. Telsmoins en sont les Hotomans, qui pour le bien de leur Principauté & de leur Religion, sçauent sagement appaiser leurs discordes, Le prouerbe est qu'une once de diuision apporte vn quintal de malheur.

Ha! Prince François, Louys le Iuste, tige de ces heureux Monarques, qui ont gouverné toute la terre, œil de la Chrestienté, & le bras droict du siege Apostolique, ie voudrois estre vn Mercure, pour pouuoir par la force de mes persuasions ap-

païser vos querelles. Si i'estois Apollon, des fleches d'or que ie tirerois de mon carquois, i'en entamerois la poiçtrine de ceux qui imprudemment vous voudroient assaillir, & si i'estois Iupiter, cent foudres vengeroient la malice de ceux qui conspirent de vous enuelopper aux rets d'une discorde ciuile. Quelle apparence y a il d'inquieter vn Royaume si florissant en pays? le mal est-il si vehement qu'il faille appliquer le feu & le cantere des armes? Dieu mercy l'on ne voit point que l'vlcere soit si profonde, qu'elle aye gasté la moindre partie de cest Estat. Les personnes Ecclesiastiques font leur deuoir, viuēt avec toute saincteté de vie. Les Prelats montent en chaire, preschent la parole de Dieu, de leur propre main manient la houlette, font paistre le Thym, l'Anis & la Marjolaine à leurs brebis, & font choses que parauanture depuis saint Denys on n'a veu faire en France, ce qui estonne & esblouit les plus iudicieux & clairvoyans. Quand à la Iustice, elle domine plus que iamais. Pour la Noblesse elle commande selon son rang; & quand au peuple il obeyt. Sçauroit on voir vn Estat mieux reglé & composé que celuy-là? les membres qui trauaillent tousiours pour l'ornement & embellissement de ce diademe, ne se plaignent point, chacun est content, personne ne gemist sous le fais de sa charge. Quand vn corps est si sain, qu'à on affaire de crier le Chirurgien qu'il porte sa lancette? Les remedes se doiuent appliquer quand il y a mal, les reglemens se doiuent faire quand il y a du desordre. Mais où toutes choses vont bien avec compas, mesure & cadance,

par le sage conseil de ceux mesmes qui font semblant de ne le vouloir ainsi, quelle apparence y ail d'imputer à l'Estat aucun desordre? On pourra dire de mesme façon que les Estoiles ne sont pas bien fichees au Ciel, & que les douze signes sont mal rengez, bref il faudra accuser l'intemperature du temps, se plaindre de l'hyuer dernier, dire qu'il a esté trop froid, & que le printemps est trop humide. Ce qui semble estrange à nos yeux, parce que nous ne sçauons point les secrets de Dieu, luy est vn cours & vne reuolution ordinaire. Il tempere les saisons comme il luy plaist, & comme il voit estre à faire, regist cest Vniuers de sa propre prudence, sans qu'il aye besoin de nostre conseil, qui sommes aueugles en ses merueilles: le semblable arriue au gouuernement des Roys, qui sont faits & taillez au modele de Dieu. Il n'est besoin que tout le monde penestre à leurs desseins, & sçache ce qu'ils font. L'Escuyer qui est à cheual, est il tenu de dire à tous propos de quel costé il veut tourner bride? Mais s'il semble qu'on voye quelque petit don ou liberalité, le coup n'est pas mortel, & la cicatrice n'est pas si grande que pour cela il faille crier à la mort. La magnificence des grands, principalement des princes, paroist en leur liberalité. Leurs Coffres doiuent estre ouuerts pour ceux qui le meritent, & fermez à double ressort pour ceux qui en sont indignes. Alexandre disoit qu'on ne sçauoit mieux cacher son Thresor, qu'en la bourse de ses amis, parce qu'on l'y trouue quand on en a besoin, les Princes ne sement iamais sur l'arene, ils sçauent bien que ce qu'ils abandonnent

leur peut profiter; Si la liberalité & munificence estoient à blasmer en vne grãde Pricesse, Calypso seroit à blasmer, d'auoir donné vne robbe si riche, semee de tant de pierreries à Vlysse, Didon d'auoir offert sen Sceptre à Enee, Artemise d'auoir trop despensé à son Mausole, Samiramis pendant la minorité de son fils, d'auoir trop donné aux Princes & grands Seigneurs de sa Cour, & Candacé Royne d'Ethiopie d'auoir nourry & esleué trop de personnes autour de soy. Ce discours est sans fondement, ce mescontentement est imaginaire, si l'on oste la liberalité, & recompense des biens faits, les Cours des Princes seront desertes. Nul ne vouldra s'aller captiuier au seruice des grands, s'il n'a l'esperance d'y pouuoir faire quelque fortune. Les grands Monarques ont tousiours eu quelques vns à l'entour d'eux, enuers lesquels ils ont eu de particulieres inclinations. Darius aymoit Zopyre, Alexandre Hephestion, si l'on demande la cause de cela, il faut demander pourquoy l'Aymant attire le fer, & pourquoy la Remore arreste les Nauires. Ceste question n'est pas nouuelle, pourquoy les Princes aiment certaines personnes (quelquesfois de moindre merite) par dessus les autres, elle feust decidee par le fer au temps de la Royne blanche mere du Roy saint Louys, contre laquelle on se falsoit de ce que en qualité de Regente, elle dispoit des finances & des Estats comme bon luy sembloit, posposant les vns, & preferant les autres. Mais ceste Royne semblable à la nostre, meü d'un bon desir de bien regir & administrer la chose publique, & d'aduancer les affaires du Royaume, ne

feust pas destituee de secours, elle vainquist ses ennemis, les mist à la raison, défit les Anglois en bataille rangée, contēta les mal-contens, & lia aux chaisnons de son obeyslance le Conte Raymond de Thoulouze, si effarouché que personne ne l'auoit scēu lier auparauant. Dieu le Protecteur des Orphelins, preside au iugement des Vefues, & herberge sous l'ombre de son aïsle sacree les Innocēns.

Ie n'eusse iamais pensé Messieurs, quē mon plumage feust si fort, voicy le premier vol que i'ay fait hors de mon pays. La region où i'ay vollé est si immense, que ie me suis penlé perdre en mō essor, ô que le langage des Princes est difficile ! i'apperçoy maintenant qu'il n'appartient qu'aux Aigles de la Cour, de regarder tels Soleils. Ie suis trop petit pour dire quelque chose qui approche du lustre & de l'excellēce de leurs merites. Mais si ce que i'ay dit vous semble auoir quelque energie, & quelque chose de bon, faites quē vos effects soiēt meilleurs. Disposez vous à seruir vostre Roy, desrouillez vos armes, & au moindre bruit du siffre & du tambour, courez, iettez vous au pied de sa Majesté, & faites esclatter ces paroles à ses oreilles.

S I R E,
SNous vous venōs offrir nos vies, marris quand nous les auriōs perdues, de ce que nous ne les pourrions recouurer, pour de rechef vous les offrir, l'experience des choses passées nous monstre qu'il ne faut point se detraquer de l'obeyssance de son Prince. Nous ne sommes point si forts & si puis-

sans, que vous deuiez faire conte de nos vœus, & sçauons fort bien quand vous voudriez espargner vos sujets, que les Royaumes, & Prouinces plus reculees, se viendroient courber à vos pieds pour vous offrir ayde & secours, le nostre n'est point necessaire, si ce n'est en tant que le deuoir nous y oblige, faites de nous ce qu'il vous plaira. Nous vous offrons ce que nous pouuons, & ce que nous deuons.

Quand il vous entendra parler ainsi il vous recœura benignement, & voyât vne generalle acclamation & applaudissement de vos volontez, cela le resiouyra merueilleusement. L'obeïssance d'un bon & fidelle subiet, sert de confort à son Prince, & donne terreur à ses ennemis. Peut estre qu'il ne sera point necessaire que vous portiez les armes pour luy. Les Princes sont si sensibles, & ont de si bons mouuemens dans leurs cœurs, qu'ils seront tous obeyssans. Vous aurez fait cependant ce qui sera de vostre charge. *Persistez, nemo coronabitur nisi qui legitime certauerim.*

F I N.



